

Cungh Hihcwngh:

Baengh Sawcuengh Aeu Ndaej Mehyah Ndei Youh Son Daihlaeng Hag Sawcuengh

钟希增:因壮文喜结良缘 又教后代学壮文

□ Cau Dwzfeih Banh Cauzyangz raiz Dahdingz hoiz

Mboengqneix, gicej bae caijfangj dwg: “ranz Sawcuengh” ndaw aen hawsingz neix ndeu, neix dwg aen ranz bouxguhnaz bingzciengz ndeu youq Mbanjyaujyenz Nanzyauj Cin Liengz-ging Gih Namzningz Si, bohranz Cungh Hihcwngh youq bi 1969 seng, seizneix guh boux fucujyin cunh-veijvei Mbanjyaujyenz.

Gij cungsime gicej caijfangj dwg: Aen ranz bouxguhnaz ndeu, liz aen si cungsime ngamq 50 goengleix, seizneix vunzmbanj cungj dap hwnj aen civaiq hawsingz haenq hwngfat nyauznyauz, lengq vunz lij guh sengeiq fat gij caiz hawsingz, hoeng daengx ranz vunz de cix vih gijmaz simmaez youq hag yungh Sawcuengh ndawde ni?

Aenvih Sawcuengh, de hawj bouxwnq deng gaeu cienzciengj

Bi 1988 ndwen 2, Cungh Hihcwngh lij doe gauhcuengh, cingqngamj bungz hagdangz vihliux ciepcoux gauhgaug cix laemzseiz haibanh aen ban son 10 ngoenz Sawcuengh ndeu, aen ban neix iucingj Vangz Gyahcu j boux lauxsae hagdangz Sawcuengh ndaw yienh neix daeuj son Sawcuengh. De bauqmingz bae camgya hag Sawcuengh. Baez son Sawcuengh neix sat le, lauxsae Sawcuengh dauq-bae hagdangz Sawcuengh lo. Doek-laeng, Cungh Hihcwngh ciengzseiz yungh Sawcuengh caeuq lauxsae Sawcuengh de doengsaenq, lauxsae ciengzseiz youq ndaw saenq haen de, naeuz de Sawcuengh hag ndaej ndei, caemhcai gujli de laebdaeb roengz-rengz hag, daengzcog vih cienzboq gij vwnzva Bouxcuengh guh’ok gij gung-yen wnggai miz haenx.

Hag rox Sawcuengh le, couh maqmuengh miz gij saw Sawcuengh buenx ndang, hoeng seizhaenx Cungh Hihcwngh cij miz dauq 《Gobwnj Ganbu》Sawcuengh ndeu, neix baenz-lawz doh gij aeuyungh de ndaej ni? Youq ndaw saenq Cungh Hihcwngh gaenq caeuq lauxsae Sawcuengh de geqhaemz gvaq, lauxsae sonyinx de dinghyawj faenh 《Gvangjsih Minzcuz Bau》(banj Sawcuengh) ndeu. Gij vaiq, Cungh Hihcwngh couh bae youzcwngh cihgiz ndaw yangh henzgyawj hagdangz dingh le faenh 《Gvangjsih Minzcuz Bau》(banj Sawcuengh) ndeu, hoeng aenvih bouxguhhong youzcwngh cihgiz ndaw yangh guh hong guh loeng, gij bauqceij de dinghyawj haenx ciengzseiz deng doek. Aenvih caen daj ndaw sim maij bauqceij Sawcuengh, Cungh Hihcwngh bae youzcwngh cihgiz fanjyingj cingzgvang gvaq, bouxguhhong youzcwngh cihgiz raen dan dwg doek faenh bauqceij iq ndeu, couh mbouj dawz haeuj rwz lo. Cungh Hihcwngh yawjraen le hozndat dangqmaz, raiz saenq bae daengz youzcwnghgiz ndaw yienh fanjyingj, doeklaeng bouxguhhong doxgven youzcwngh cihgiz deng gaeu bae 3 ndwen cienzciengj.

Gauhgaug saetbaih le dauqma

ranz guh hongreih hongnaz, hoeng Cungh Hihcwngh cix mbouj vutvak Sawcuengh bae, ciengzgeiz laebdaeb gag okcienz dinghyawj 《Gvangjsih Minzcuz Bau》(banj Sawcuengh) caeuq 《Sam Nyied Sam》(banj Sawcuengh). Bi 1989, ndaej daengz Lij Cungzsiz boux vunz mwhhaenx guh boux fucungbien Gvangjsih Sam Nyied Sam Cazcise neix yiedcingz bangcoh, de camgya le aen ban son yungh Sawcuengh raiz faenzcieng haenx, hainduj yungh Sawcuengh raiz faenzcieng douzgauj. Bi 1990, 《Cawx Byalgw》bien faenzcieng Cungh Hihcwngh baez daih’it yungh Sawcuengh raiz baenz neix dauqdaej youq 《Sam Nyied Sam》(banj Sawcuengh) geiz daihngaih bihaenx fatbiuj lo, neix hawj de angq raixcaix, daj neix hainduj de couh maij hwnj yungh Sawcuengh raiz faenzcieng lo.

Gij ndwenngoenz guh hongreih hongnaz nyaengq lai. Hoeng baez ndaejhoengq, Cungh Hihcwngh cungj dwg mbouj lumz yungh Sawcuengh yungh gij vwnzdij sawcuenh, sanj-vwnz, fwen daengj raiz di faenzcieng Sawcuengh fanjyingj gij ndwenngoenz lajmbanj haenx. Gaenh 30 bi neix daeuj, Cungh Hihcwngh lienzdaemh youq 《Gvangjsih Minzcuz Bau》(banj Sawcuengh), 《Sam Nyied Sam》(banj Sawcuengh) fatbiuj le 200 lai bien faenzcieng Sawcuengh. Aenvih gij faenzcieng de douzgauj haenx caet-liengh haemq sang, soqliengh haemq lai, de ndaej Gvangjsih Minzcuz Bause bingz baenz nienzdoh dugh-sinyenz maenhndei haujlai baez gvaq.

Aenvih Sawcuengh, de ra ndaej bouxvunz caencingq rox bonjfaenh caemhcai guh baenz gvanbaz

Ngamq hag raiz faenzcieng geij bi haenx, vihliux doxhag, Cungh Hihcwngh lai gyau baengzyoux, youq gak dieg Mbanjcuengh cungj miz geij boux youxbit, youksaenq, ndawde couh miz boux lauxsae Laizbinh ndeu heuhguh Hoz Cunghliuj, de lai baez son Hihcwngh raiz faenzcieng gvaq. Miz baez ndeu, Cungh Hihcwngh bae daengz ranz yawj Hoz lauxsae, youq Hoz lauxsae gizhaenx de roxnaj le dah lwgsau ndeu heuhguh Se Ginhlungz, Se Ginhlungz caengz ndaej hag Sawcuengh gvaq, gig boiqfug gij dungxaiz raiz faenzcieng Sawcuengh Cungh Hihcwngh, yienhneix song vunz de aenvih Sawcuengh guh moiz couh doxmaij lo. Baenzgya le, Cungh Hihcwngh lij dwg caeuq haujlai baengzyoux raiz faenzcieng haenx miz saenq baedauq, youq gij baengzyoux raiz faenzcieng haenx ndawde, miz bouxsai hix miz mehmbwk, gij saenq baedauq haenx cungj dwg yungh Sawcuengh daeuj raiz. Mbouj rox daj seizlawz hainduj, Se Ginhlungz doiq gij saenq Sawcuengh baengzyoux

Cungh Hihcwngh fat ma haenx yied daeuj yied raen miz yinx lo. Se Ginhlungz cungj dwg youq seiz ndaej-hoengq aeu gij saenq haenx daeuj cang vunq guh yiengh dwk yawj, couh lumj doe ndaej rox gij neiyungz de nei.

Mwhhaenx, Cungh Hihcwngh maij youq haetromh caeuq banhaemh yungh gij yaem biucinj doe Sawcuengh, moix baez daengz mwh de yungh singyaem gyaundeiz miz gamjingz bae doe gij faenzcieng gwnz bauqceij ganhvuz, Se Ginhlungz couh maij youq henz de nyinhcaen dingq de doe. Nanz le, Se Ginhlungz hix yawj rox Sawcuengh lo, de mbouj-dan yawj rox gij saenq gyoengq baengzyoux raiz faenzcieng haenx raiz daeuj hawj goenggvann haenx, lij hag rox yungh Sawcuengh raiz faenzcieng, engq hawj Cungh Hihcwngh doeksaet dwg, mehyah doeklaeng hix youq gwnz 《Gvangjsih Minzcuz Bau》(banj Sawcuengh) fatbiuj le bien faenzcieng Sawcuengh coh heuhguh 《Angq Baenz Meh》ndeu.

Aenvih Sawcuengh, dahlwg de bauq doe aen ciennieb vawsaw minzcuz

Cungh Hihcwngh gvanbaz miz song dah lwg, dahdaih heuhguh Cungh Yujgingh, dahngaih heuhguh Cungh Yuzsiu. Youq ndaw rizroen song dah lwg majhung, Cungh Hihcwngh daeng-daengq son Vahcuengh biucinj caeuq Sawcuengh hawj gyoengqde rox gonq. Mwh song dah lwg hainduj hag gangjvah, Cungh Hihcwngh couh son gyoengqde yungh Vahcuengh biucinj gangj vah. Miz baez ndeu baengzyoux daeuj yawj de, dingqnyi dahngaih Cungh Hihcwngh ngamq hwnj youwzyenz haenx yungh Vahcuengh biucinj heuh de “daxboh”, couh geizheih cam naeuz: “Gyoengqsou gizneix dwg gangj Vahcuengh biucinj ha?” “Aenvih Mbanjyaujyenz yienz-naeuz dwg mbanj Bouxcuengh, hoeng aenvih dieg youq gyawj henz hawsingz, caeuq vunz ndaw sing doxyau haemq lai, seizneix vunz ndaw mbanj dingzlai dwg gangj Begvah Namzningz caeuq Vahbuj-dung, ndigah baengzyoux couh miz gij ngeizvaeg baenzneix lo.

Doiq gij ngeizvaeg baengzyoux, Cungh Hihcwngh baenzneix dap: Moix bi daengz seizciet cingmingz, yawjraen baenz bang baenz bang bouxsauqmoh dingzlai vunz cungj dwg gangj Begvah Namzningz caeuq Vahbuj-dung, de caeuq lumj gangj vahriu nei doiq song dah lwg naeuz: “Gij vah doenghgi vunz neix gangj haenx, cojcoeng coenz ndeu hix dingq mbouj rox, gyoengqde cungj lumz cojcoeng bonjfaenh liux lo, sou gaej hag gyoengqde bw!” Cungh Hihcwngh lij naeuz, son song dah lwg hag Vahcuengh biucinj dwg vihliux hawj gyoengqde hag Sawcuengh, engq ndei bae swncienz vahcoj. Dingq gij

vah daj ndaw sim okdaej neix liux, baengzyoux couh engq boiqfug lo.

Song dah lwg daj iq couh dingq daxboh doe Sawcuengh, dingq gij go Vahcuengh Daengsaenq majhung, deng yingjyangj nanz le, hix hag rox Sawcuengh lo. Dahdaih doe siujyoz haj nienzgaep hainduj couh yungh Sawcuengh raiz faenzcieng ndaej lo, lij douzgauj hawj 《Gvangjsih Minzcuz Bau》gvaq, seizneix dahngaih cingq doe cuhcungh haenx hix yawj rox gij bauqceij cazci Sawcuengh. Bi 2016, dahdaih aenvih cingzcik ndei gauj hwnj aen ciennieb vwnzyoz vawsaw minzcuz vunznoix Cunghyangh Minzcuz Dayoz, gauj hwnj aen hagdangz mizmingz Baekging caen dwg mbouj ngaih.

Aenvih Sawcuengh, de guh boux fujdaujyenz hagdangz

Cungh Hihcwngh cawz son vunz ndaw ranz hag Sawcuengh, de lij miz aen maqmuengh baenzneix dem——maqmuengh Sawcuengh ndaej youq gwnzbiengz cienzdoh wngqyungh, ndaej haeuj hagdangz. Muengh le haujlai bi, gihvei dauqdaej daeuj lo, bi 2015 ndwen 3, Cungh Hihcwngh ndaej aen saunenzgungh hagdangz lajmbanj Nanzyauj Cin Cungsime Hagdangz cingj bae guh boux fujdaujyenz roghag. De yungh Sawcuengh bien raiz le haujlai hot fwenliuzloh caemhcai son hagseng eu dem, ndawde bien cozbij 《Aen Loqsiengj Cungguek Fukhwng Itdingh Baenz》de camgya cauuhguh neix aeundaej ngeih daengciengj daihcib gaiq Namzningz Si cungh siujyoz ndawhag yingjsiciengj bingzsenj hozdung caeuq ngaenzciengj Cunghyangh Den’gyaugvanj ndawhag yingjsi cezmuz maenhndei, lij youq “segi mingzsingh hung” doxdax Aen Binzdau Hawsingz Gvangjsih Densi-daiz aeundaej cingzcik ndei. 《Bae Daengz Bya Lawz Eu Fwen Lawz》bien cozbij de cauuhguh neix riengz aendoih vwnzyi hagdangz wngqiu bae camgya Aen Vanjvei “Fanj Seiq Cungj Fungheiq” Gijveij Namzningz Si banh haenx gvaq, lij daibayuj Liengzging Gih bae Sanglinz camgya eu fwen doxdax Namzningz Si banh haenx, aeundaej ciengjmaenhndei. Bi 2016 ndwen 12, Cungh Hihcwngh sonyinx hagseng aen hagdangz neix camgya Namzningz Si gaiq daih’it Vahcuengh biucinj doe ginghdenj doxdax, aeundaej cizdijcuj sam daengciengj.

Cungh Hihcwngh lij maqmuengh, daengzcog ndaej youq hagdangz bangcoengh lajde haibanh saek aen ban Sawcuengh yinxdaeuz, aeu gij cihsiz Vahcuengh Sawcuengh bonjfaenh hag ndaej haenx son hawj gyoengq hagseng, hawj gyoengqde ndaej yungh Sawcuengh daeuj geiqloeg go Vahcuengh, aeu gij vwnzva conzdungj maenhndei Bouxcuengh swncienz fatyengz roengzbae.